

**ეთიკის კომისიის
ზეპირი
რ ე კ ო მ ე ნ დ ა ც ი ა**

შეკითხვის კომისიაში შემოსვლის თარიღი: 04.12.2014

შეკითხვის რეგისტრაციის ნომერი: 023/14

შეკითხვა:

ადვოკატმა, ერთ-ერთ ადმინისტრაციულ ორგანიზაციულ მიმართულ განცხადებაში, სიტყვიერი შეურაცხყოფა მიაცენა მის კოლეგას. არსებობს თუ არა ადვოკატთა პროფესიული ეთიკის კოდექსში მსგავსი შემთხვევის მარეგულირებელი ნორმა? შესაძლებელია თუ არა, რომ ასეთ დროს ადვოკატმა საჩივრით მომართოს ეთიკის კომისიას და რა შედეგი შეიძება დადგეს?

ანალიზი:

ადვოკატთა პროფესიული ეთიკის კოდექსის მე-7 მუხლი: „ადვოკატი ვალდებულია პატივი სცეს კოლეგებს, არ შელახოს მათი ღირსება და დაიცვას პროფესიული ღირებულებები.“

ადვოკატთა პროფესიული ეთიკის კოდექსის მე-10 მუხლის 1-ლი ნაწილი: „ადვოკატი ვალდებულია პატივი სცეს თავის კოლეგას.“

„ადვოკატთა დისციპლინური პასუხისმგებლობისა და დისციპლინური წარმოების შესახებ“ დებულების მე-6 მუხლის „ბ“ ქვეპუნქტი: „დისციპლინური წარმოების დაწყების საფუძველია: ადვოკატის საჩივარი სხვა ადვოკატის მიერ დისციპლინური გადაცდომის ჩადენის თაობაზე.“

ადვოკატის მხრიდან განხორციელებული სიტყვიერი შეურაცხყოფა ეწინააღმდეგება პროფესიული ეთიკის ნორმებს. ადვოკატმა ნებისმიერ სიტუაციაში უნდა შეინარჩუნოს პროფესიული ღირსება, გამოიჩინოს მოთმინება და პატივი სცეს თავის საქმიანობას. ეთიკის კომისია რეკომენდაციის გაცემისას აღნიშნავს, რომ კოლეგიალობის პრინციპი გულისხმობს კოლეგების მიმართ პატივისცემას, პროფესიული ღირსების დაცვასა და პროფესიული სტანდარტების შესაბამისად მოქმედებას.

ეთიკის კომისიამ 2007 წლის 29 მაისის გადაწყვეტილებით /დისციპლინურ საქმეზე № 2743/05/07 დაადგინა: „ადვოკატმა თავისი პროფესიული საქმიანობის განხორციელებისას უნდა დაიცვას კოლეგიალობის პრინციპი და გამოხატოს პატივისცემა კოლეგისადმი, მიუხედავად მისი სამართლებრივად ან სხვაგვარად საწინააღმდეგო მხარის არსებობისა/მდგომარეობისა“

ეთიკის კომისიამ 2011 წლის 5 სექტემბრის გადაწყვეტილებით დისციპლინურ საქმეზე №069/11 დაადგინა: „ადვოკატები სხვა მოქალაქეების მსგავსად სარგებლობენ გამოხატვის

თავისუფლებით იმ „მოვალეობებისა და პასუხისმგებლობის“ გათვალისწინებით, რომელთაც მათ პროფესია აკისრებს“.

ადვოკატის მიერ კოლეგიათვის სიტყვიერი შეურაცხყოფის მიყენება, დადასტურების შემთხვევაში, შესაძლოა არღვევდეს ადვოკატებს შორის არსებულ კოლეგიალობის ვალდებულებას. ადვოკატთა პროფესიული ეთიკის კოდექსი მე-7 და მე-10 მუხლებით ავალდებულებს ადვოკატებს, პროფესიული საქმიანობის განხორციელებისას, იმოქმედონ ურთიერთპატივისცემის პრინციპის დაცვით, შესაბამისად, ეთიკის კოდექსის აღნიშნული ნორმების მიხედვით, დასჯადია ქმედება, რომელიც არღვევს კოლეგიალობის ვალდებულებას. ეთიკის კომისიის პრაქტიკა იცნობს შემთხვევებს, როდესაც დისციპლინური სამართალწარმოების დაწყების საფუძველი იყო აღნიშნული პრინციპების შესაძლო დარღვევა.

იმ შემთხვევაში, თუ ადვოკატი ფიქრობს, რომ კოლეგის ქმედებით დაირღვა მისი უფლებები, მას შეუძლია საჩივრით მიმართოს სსიპ „საქართველოს ადვოკატთა ასოციაციის“ ეთიკის კომისიას. დისციპლინური წარმოების დაწყების ერთ-ერთი საფუძველი „ადვოკატთა დისციპლინური პასუხისმგებლობისა და დისციპლინური წარმოების შესახებ“ დებულების მე-6 მუხლის „ბ“ ქვეპუნქტის მიხედვით არის ადვოკატის საჩივარი სხვა ადვოკატის მიერ დისციპლინური გადაცდომის შესაძლო ჩადენის თაობაზე.

ეთიკის კომისიაში დისციპლინური სამართალწარმოება მიმდინარეობს შეჯიბრებითობისა და მხარეთა თანასწორობის პრინციპების დაცვით. შესაბამისად, წინასწარ სავალდებულოდ ვერ განისაზღვრება საჩივრის შემოტანის შემთხვევაში სამართალწარმოების შესაძლო შედეგი. კონკრეტულ შემთხვევაში საქმის განმხილველი კოლეგია მიიღებს გადაწყვეტილებას საქმეში არსებული მტკიცებულებებისა და ახსნა-განმარტებების საფუძველზე. საჩივრის შემოტანის შემთხვევაში შესაძლოა დადგეს ადვოკატის დისციპლინური პასუხისმგებლობის საკითხი.

„ადვოკატთა შესახებ“ საქართველოს კანონის 34-ე მუხლის 1-ლი ნაწილის მიხედვით ადვოკატის დისციპლინური სახდელის სახეებია გაფრთხილება, საადვოკატო საქმიანობის უფლების ჩამორთმევა 6 თვიდან 3 წლამდე და ადვოკატთა ასოციაციის წევრობის შეწყვეტა, ხოლო ამავე მუხლის მეორე ნაწილის მიხედვით ადვოკატზე დისციპლინური ზემოქმედების ღონისძიებებია კერძო სარეკომენდაციო ბარათით მიმართვა და საქართველოს ადვოკატთა ასოციაციის, აღმასრულებელი საბჭოს, ეთიკის კომისიის, სარევიზიო კომისიის წევრის უფლებამოსილების შეწყვეტა.

დასკვნა:

ადვოკატის მიერ კოლეგიათვის შეურაცხყოფის მიყენება, დადასტურების შემთხვევაში, შესაძლოა არღვევდეს ადვოკატებს შორის არსებულ კოლეგიალობისა და ურთიერთპატივისცემის ვალდებულებას, რომელიც გათვალისწინებულია ადვოკატთა პროფესიული ეთიკის კოდექსის მე-7 მუხლითა და მე-10 მუხლის 1-ლი ნაწილით. ადვოკატს შეუძლია საჩივრით მიმართოს ს.ს.ი.პ. „საქართველოს ადვოკატთა ასოციაციის“ ეთიკის კომისიას. კონკრეტულ შემთხვევაში საქმის განმხილველი კოლეგია მიიღებს გადაწყვეტილებას საქმეში არსებული მტკიცებულებებისა და ახსნა-განმარტებების საფუძველზე. საჩივრის შემოტანის შემთხვევაში შესაძლოა დადგეს საჩივრის ადრესატი ადვოკატის დისციპლინური პასუხისმგებლობის საკითხი.

რეკომენდაცია არ არის სავალდებულო ეთიკის კომისიის ან სასამართლოს მიერ რომელიმე დისციპლინური საქმის განხილვისას. თუმცა შესაძლებელია გამოყენებული იქნეს ერთ-ერთ წყაროდ ეთიკის კომისიის გადაწყვეტილებაში.